

फिलेमोनलाई पावलए परींद ओयो चिथी

आव चिथी फिलेमोनलाई पावलए झ्यालखानानी परींद ओयो ज़। फिलेमोन परमेस्वरलाई उयुँ हुपज़्याव कलस्सी सहरलाव तोबो धनी मिँ ओल्यो। नोए ओबाँदा ओनेसिमस यादोज्यावए कातार हाइद धों:द ओबाव ओल्यो (फिलेमोन १५,१८)। धों:द ओबाव छीनी परमेस्वरलाई उयुँ हुपद, झ्यालखानाल लिज़्याव पावललाई ओसघैज़्याव (१०,१३)। है जैद आव चिथील ओनेसिमस फरी ओसाहुए उधूँल ल्यो भें:द, नोलाई फिलेमोनए बाँदा वाज़ मा:क, उयुँ हुबो भाइ मिताव समजिद सुमो ताके लिन्या सरें:सिउ लिज़्या (१६-१७)।

1 डा पावल, येसु ख्रीसए ओयेनए जूनी झ्यालखानाल लिज़्याव सोनो डास लिज़्याव तिमोथीस गिन्ल्योनी नँ गिनस परमेस्वरए ओयेनताव खतैसिउ गिनयुँलाव गिनभाइ फिलेमोनलाई आव चिथी परींद गिन्ईज़्या। 2 आव चिथी परमेस्वरए ओपाँताव गोबैनी अपफिया, गेस सिप सिप परमेस्वरए ओयेन दाज़्याव अखिर्वपस, सोनो नझिमक दुप्सिज़्याव मन्दलीए जूनी पाला ज़। 3 परमेस्वर गोबाबु सोनो गोप्रभु येसु ख्रीसनी नियुँ जेल्योदा ओगराँक, जेयुँ होलाँ जैद ओयाचिरक।

पावल फिलेमोनस खुसी ओताव

4 नँ फिलेमोनए नजूनी परमेस्वरलाई डापोंखारिक एकमन्या नमिन हाइद धन्याबाद चरै:व ज़ डानैज़्या, 5 काराव ल्यो ताकिन नँ गोप्रभु येसु ख्रीसलाई नयुँ हुपद परमेस्वरए छैँव उमीरालाई मया दाद नरासमारिज़्याव डाथैज़्या। 6 नो परमेस्वरए उमिनत नयुँ हुपद नदोज्याव येननी ख्रीसए ओयासिउ चाव पॉर बुझिन्या युँ झन ज़ उईवक लिद डापोंखारिज़्या। 7 अ डाभाइ, नँ परमेस्वरए छैँव उमीरालाई समारिद यायुँ होलाँ जैद नराएज़्यावनी डा ब डायुँ होलाँ

ताद रेंव ज़ डालिज़्या।

ओनेसिमसए जूनी पावलए उबिन्ती

8डा नँलाई 'आव दोयो' है दान्या ख्रीसनी डाहक उलिदी ब नँलाई कर मालैद, 9 डाल्योदा नस० तरा नचींज्यावनी ज़ नदोकिन ताखेहो लिद डाबिन्ती लिज़्या। डा पावल इताव सेरो मिँ येसु ख्रीसए उमिनत कैदी तावए, 10 नँस ओनेसिमसए उजूनी तोबो बिन्ती डादोज़्या। नो मिँ आव झ्यालखानाल परमेस्वरए ओपाँत डाजमैव डाज़ा ज़। 11 नो मिँ डादा नजूनी कान्ल ज़ काम मालागिउ ओल्यो। अब ते नजूनी सोनो डाजूनी ओचाहित ल्यो ताद ले। 12 है जैद नो डायुँ स्याताव मिँलाई नल्योदा डापरींज्या। 13 डा चाव था डारासथैवए झ्यालखानाल डालिज़्याक नो मिँए नँ नपोल डासेवा घदोवक लिद डास नैव ते डापैव। 14 खाली नँ 'ताए' है नमाल्योवा पै डामानैके। नँ डाल्योदा जो मिताव नदोदी ब करनी माःक, नयुँ स्यानी वाज़ ओताक है डालिज़्या। 15 नो मिँ आल धोःद उहुव तोबो ओअर्थ ल्यो लिज़्या। जाँवाए जूनी नल्योनी ओधोःदी ब, आकिन ते सग्याको नँस ज़ एकमन्या लिन्या ले। 16 आकिनी आव नबाँदा वाज़ माःक, साचो नयुँलाव नभाइ स्यासो ब तारिज़्या। डा डाभाइ ते ताधुके। नँलाई ते झन नबाँदा ब ताके, प्रभुए उमिनताव नभाइ ब ताके।

17नँ डालाई ननै मिताव नसमजिनाकिन डाडाः रँःद नोलाई नैव ताके। 18 नोए नउपर्त मादान्या येनर ओदोव ताकिन, सोनो कातार हाइद उईव ताकिन, डा ज़ नँलाई ओलोइ डाईया। 19 डा पावलए ज़ 'डाफोःया' लिद डासही छाप ब झाःद डाईके। खाली नँलाई डाबाँचैनिउ डागुन उलिदी ब डागुन लिज़्या है डामादीए। 20 है जैद नँ डाभाइ, प्रभुए उमिननी डाबिन्तीर थैद, ख्रीसलाई याका दाद डायुँ होलाँ जैद्याव ताके। 21 आव डासरोलाव है डादीवकिन झन कुधु ज़ नदोया लिद डायुँ हबो ज़ लिज़्या।

तुपैन्या पाँर

²²फरी ब नँस तोबो डाबिन्ती लिज़्या, नझिमक जाँवा पै लिन्याए जूनी पो तोबो जैद्याव ताके। डाजूनी जेपोंखारिज़्याव मिताव आनी पुलुस्द डाहुइ सैं लिन्या मिताव ब लिज़्या।

²³येसु ख्रीसए उमिननी डास इयालखानाल लिज़्याव इपाफ्रासए ल्योनी जेरो है दींज़्याव। ²⁴डास सिप येन दाज़्याव डानैर, मर्कूस, अरिस्तार्खस, देमास सोनो लूकाराए ल्योनी ब जेरो है दींज़्यार।

²⁵गेप्रभु येसु ख्रीसए उयुँ गराँद जेयुँल बास ओदोवक।

साःरो बाचा

Kham, Western Parbate: साःरो बाचा (New Testament)

copyright © 2015 Wycliffe Bible Translators, Inc.

Language: (Kham, Western Parbate)

Contributor: Wycliffe Bible Translators, Inc.

Promotional text filled to upload to DBL.

All rights reserved.

2020-11-18

PDF generated using Haiola and XeLaTeX on 30 Dec 2021 from source files dated 30

Nov 2021

258cde44-1703-5da4-948d-94a8b2e9b9dd